

官常典第四百八卷

行人司部名臣列傳三

北周 楊荐

按周書本傳荐字承略秦郡靈夷人也父寶昌平郡守荐幼孤早有名譽安進爵清水縣子魏大統永安中隨爾朱天光入關討羣賊封高邑縣男文帝臨夏州補帳內都督及平侯莫陳悅使荐入洛陽請事魏孝武帝授文帝關西大行臺仍除荐直閣將軍時馮翊長公主薨居孝武意欲歸諸文帝乃令武衛元毗喻旨荐歸白文帝又遣荐入洛陽請之孝武卽許焉孝武欲向關中荐贊成其計孝武曰卿歸語行臺迎我文帝又遣荐與長史宇文測出關候接孝武至長安進爵清水縣子魏大統元年蠕蠕請和親文帝遣荐與楊寬使并結婚而還進爵爲侯又使荐納幣於蠕蠕魏文帝郁久閭后崩文帝遣僕射趙善使蠕蠕更請婚善至夏州聞蠕蠕貳於東魏欲執使者善懼乃還文帝乃使荐往賜黃金十斤雜綵三百疋荐至蠕蠕責其背惠食言并論結婚之意蠕蠕感悟乃遣使隨荐報命焉及侯景來附文帝令荐與鎮遏荐知景翻覆遂求還具陳事實文帝乃遣使密追助景之兵尋

而景叛十六年大軍東討文帝恐蠕蠕乘虛寇掠乃遣荐往更論和好以安慰之進使持節驃騎大將軍開封儀同三司加侍中孝閔帝踐祚除御伯大夫進爵姚谷縣公仍使突厥結婚突厥可汗弟地頭可汗阿史那庫頭居東面與齊通和說其兄欲背先約計謀已定將以荐等送齊荐知其意乃正色責之辭氣慷慨涕泗橫流可汗慘然良久曰幸無所疑當共平東賊然後發遣我女乃令荐先報命仍請東討以奉使稱旨遷大將軍保定四年又納幣於突厥還行小司馬又行大司徒從陳公純等逆女於突厥進爵南安郡公天和三年遷總管梁州刺史後以疾卒

柳弘

按周書柳慶傳慶子機字匡時少有令譽風儀辭令爲當世所推歷小納言開府儀同三司宗中大夫大象中御正上大夫華州刺史機弟弘字匡道少聰穎亦善草隸博涉羣書辭彩雅贍與弘農楊素爲莫逆交解巾中外府記室叅軍建德初除內史上士歷小宮尹御正上士陳遣王偃民來聘高祖令弘勞之偃民謂弘曰來日至於藍田正逢滋水暴長所齎國信溺而從流今所進者假之從吏請勒下流人見爲追尋此物也弘曰昔淳于之獻空籠前史稱以爲美足下假物而進詎是陳君

之命乎偃民慙不能對高祖聞而嘉之盡以偃民所進之物賜弘乃令報聘占對詳敏見稱於時使還拜內史都上士遷御正下大夫尋卒於官時年三十一高祖甚惜之贈晉州刺史揚素誅之曰山陽王弼風流長逝穎川荀粲零落無時修竹夾池永絕梁園之賦長楊映沼無復洛川之文其爲士友所痛惜如此有文集行於世

杜杲

按周書本傳杲字子暉京兆杜陵人也祖建魏輔國將軍贈豫州刺史父皎儀同三司武都郡守杲學涉經史有當世幹略其族父瓚清貞有識鑒深器重之常曰吾家千里駒也瓚時仕魏爲黃門侍郎兼度支尙書衛大將軍西道行臺尙孝武妹新豐公主因薦之於朝廷永熙三年起家奉朝請累遷輔國將軍成州長史漢陽郡守世宗初轉修城郡守屬鳳州人仇周貢等搆亂攻逼修城杲信洽於民部內遂無叛者尋而開府趙昶諸軍進討杲率郡兵與昶合勢遂破平之入爲司命上士初陳文帝弟安成王瑒爲質於梁及江陵平瑒隨例遷長安陳人請之太祖許而未遣至是帝欲歸之命杲使焉陳文帝大悅卽遣使報聘并賂黔中數州之地仍請晝野分疆永敦鄰好以杲奉使稱旨進

授都督治小御伯更往分界焉陳人於是以魯山歸我帝乃拜頊柱國大將軍詔杲送之還國陳文帝謂杲曰家弟今蒙禮遣實是周朝之惠然不還彼魯山亦恐未能及此杲答曰安成之在關中乃咸陽一布衣耳然是陳之介弟其價豈止一城本朝親睦九族恕已及物上遵太祖遺旨下思繼好之義所以發德音者蓋爲此也若知止俾魯山固當不貪一鎮况魯山梁之舊地梁卽本朝蕃臣若以始末言之魯山自合歸國云以尋常之士易己骨肉之親使臣猶謂不可何以聞諸朝廷陳文帝慚恧久之乃曰前言戲之耳自是接遇有加常禮及杲還命引升殿親降御座執手以別朝廷嘉之授大都督小載師下大夫治小納言復聘於陳中山公訓爲蒲州總管以杲爲府司馬州治中兼知州府事加使持節車騎大將軍儀同三司及華皎來附詔令衛公直督元定等援之與陳人交戰我師不利元定等並沒自是連兵不息東南騷動高祖患之乃授杲御正中大夫後四年遷温州刺史賜爵義興縣伯大象元年徵拜御正中大夫復使於陳二年除申州刺史加開封儀同大將軍追爵爲侯邑一千三百戶除同州司會隋開皇元年以杲爲同州總監進爵爲公俄遷工部尙書二年除西南道行臺兵部尙書尋以疾卒子運大象末宣納上士杲兄長暉位至儀同三司

袁敞

按周書蕭管傳袁敞陳郡人祖昂司空父士俊安成內史敞少有器量博涉文史以吏部郎使詣闕時主者以敞班在陳使之後敞固不從命主者詰之敞對曰昔陳之祖父乃梁諸侯之下吏也棄忠與義盜有江東今大周朝宗萬國招攜以禮若使梁之行人在陳人之後便恐彝倫失序豈使臣之所望焉主者不能屈遂以狀奏高祖善之乃詔敞與陳使異日而進還以稱旨遷侍中轉左民尚書從蕭瑄入隋授開府儀同三司終於譙州刺史子謐謙

隋 伊婁謙

按隋書本傳謙字彥恭本鮮卑人也其先代爲酋長隋魏南遷祖信中部太守父靈相降二州刺史謙性忠直善辭令仕魏爲直閣將軍周受禪累遷宣納上士使持節車騎大將軍武帝將伐齊引入內殿從容謂曰朕將有事戎馬何者爲先謙對曰愚臣誠不足以知大事但僞齊僭擅跋扈不恭沉溺倡優耽昏翽藥其折衝之將斜律明月已斃讒人之口上下離心道路仄目若命六師臣之願也帝大笑因使謙與小司寇拓拔偉聘齊觀豐帝尋發兵齊王知之令其僕射陽休之責謙曰貴朝盛

夏徵兵馬首何向謙答曰僕憑式之始未聞興師設復西增白帝之城東益巴丘之戍人情恆理豈足怪哉謙參軍高遵以情輸於齊遂拘留謙不遣帝克并州召謙勞之曰朕之舉兵本俟卿還不圖高遵中爲叛逆乖朕宿心遵之罪也乃執遵付謙任令報復謙頓首請赦之帝曰卿可聚衆唾面令知愧也謙跪曰以遵之罪又非唾面之責帝善其言而止謙竟待遵如初其寬厚仁恕皆此類也尋賜爵濟陽縣伯累遷前驅中大夫大象中進爵爲侯加位開府高祖作相授亳州總管俄徵還京既平王謙謙恥與逆人同名因爾稱字高祖受禪以彥恭爲左武侯將軍俄拜大將軍進爵爲公數年出爲澤州刺史清約自處甚得人和以疾去職吏人攀戀行數百里不絕數歲卒於家時年七十子傑嗣

唐 夏侯端

按唐書本傳端壽州壽春人梁尙書左僕射詳孫也仕隋爲大理司直高祖微時與相友大業中討賊河東表端爲副端窺數術密語高祖曰玉牀搖帝坐不安晉得歲真人將興安天下之亂者其在公乎但上性沈忌內惡諸李今金才已誅次且取公宜早爲計帝感其言義師興端在河東吏捕送

長安帝入京師釋囚引入臥內擢祕書監李密之降關東地未有所屬端請假節招諭乃拜大將軍爲河南道招慰使卽傳檄州縣東薄海南捷淮二十餘州遣使順附次譙州會亳汴二州刺史降王世充道塞無所歸計窮彷徨麾下二千人糧盡不忍委端去端乃殺馬宴大澤中謂衆曰我奉王命義無屈公等有妻子徒死無益吾丐若首持與賊以取富貴衆號泣不忍視端亦泣欲自刎爭持之乃止行五日餓死十四三遇賊衆潰從者纔三十餘人遂東走擯登豆以食端持節臥起歎曰平生不知死地乃在此縱其下令去毋俱沒會李公逸守杞州勒兵迎端時河南地悉入世充公逸感端之節亦固守世充遣人以淮南郡公尙書少吏部印綬召端解所服衣以贈端曰吾天子使寧汙賊官耶非持首去不可見卽焚書及衣因解節毛懷之間道走宜陽歷崖峭榛莽比到其下僅有在者皆體髮癯焦人不堪視端入謁自謝無功不及危困狀帝憫之復拜祕書監出爲梓州刺史散祿廩周孤窮不爲子孫計貞觀元年卒

鄭元璠

按唐書鄭善果傳鄭元璠字德芳隋沛國公譚之子性察慧愛尙文藝以父功拜儀同襲爵累遷右

衛將軍更封莘國公大業末出爲文城郡守高祖兵興遣將張綸西略地攻拔其城係致軍門釋之授太常卿與襄武王琛使突厥還爲叅旗將軍元璿習軍旅事帝令教諸屯軍法劉武周將宋金剛與突厥處羅可汗犄角寇汾晉詔元璿諭罷可汗兵不聽乃進爲武周援會暴疾其下意元璿真毒囚之處羅死頡利立留帳中數年帝旣許可汗婚元璿始得還帝勞曰卿不辱於虜可輩蘇武張騫矣拜鴻臚卿母喪免會突厥提精騎數十萬身自將攻太原詔卽苦次起元璿持節往勞旣至虜以不信咎中國元璿隨語折讓無所屈徐乃數其背約突厥愧服因好謂頡利曰突厥得唐地無所用唐得突厥不可臣而使兩不爲用而相攻伐何哉今掠財資劫人口皆入所部可汗一不得豈若仆旗接好則金玉重幣一歸可汗且唐有天下約可汗爲兄弟使驛銜筆於道今坐受其利不肯乃蔑德貽怨自取勞苦若何頡利當其言引還太宗賜書曰知公口伐可汗如約遂使邊火息燧朕何惜金石賜於公哉貞觀三年復使突厥還言夷狄以馬羊準盛衰今突厥六畜不蕃人色若菜牙肉飯粟化爲血不三年必亡無幾突厥果敗後轉左武侯大將軍坐事免起爲宜州刺史以老致仕卒贈幽州刺史諡曰簡元璿幹敏所至常有譽五聘絕域危不脫終不自爲解然譯事後母不謹隋文帝

嘗賜孝經愧最之至元璠亦不以孝聞士醜其行

崔敦禮

按唐書本傳敦禮字安上祖仲方在隋爲禮部尙書其先博陵著姓魏末徙爲雍州咸陽人敦禮涉書傳以節義自將武德中官通事舍人善辭令進止觀者皆竦嘗持節幽州召廬江王瑗瑗以舉兵執之脅問朝廷事敦禮不爲言太宗壯之遷除左衛郎將賜金幣良馬擢中書舍人四遷兵部侍郎出爲靈州都督召還拜兵部尙書詔撫輯回紇鐵勒部姓會薛延陀寇邊與李勣合兵攻破之置祁連州處其餘衆瀚海都督回紇吐迷度爲下所殺詔往綏定立其嗣而還敦禮通知四夷情僞其少慕蘇武爲人故屢使突厥前後建明允會事機永徽四年拜侍中監修國史累封固安縣公進中書令兼檢校太子詹事以久疾自言不任事奉兩宮更拜太子少師同中書門下三品弟餘慶時爲定襄都督府司馬召使侍疾卒年六十一高宗爲舉哀京雲龍門賻布祕器尤厚贈開府儀同三司并州大都督諡曰昭陪葬昭陵餘慶位亦至兵部尙書

和逢堯

按唐書本傳逢堯岐州岐山人武后時負鼎詣闕下上書自言願助天子和飭百度有司讓曰昔桀不道伊尹負鼎於湯今天子聖明百司以和尙何所調逢堯不能答流莊州十餘年乃舉進士高第累擢監察御史突厥默噉請尙公主逢堯以御史中丞攝鴻臚卿報可默噉遣賁近頡利來曰詔送金鏤具鞍乃塗金非天子意使者不可信雖得公主猶非實請罷和親欲馳去左右色動逢堯呼曰我大國使不受我辭可輒去乃牽持其人謂曰漢法重女壻而送鞍具欲安且久不以金爲貴可汗乃貪金而不貴信邪默噉聞曰漢使至吾國家矣斯食鐵石人不可易因備禮以見逢堯說之曰天子昔爲單于都護思與可汗通舊好可汗尙嚮風慕義襲冠冕取重諸藩默噉信之爲斂髮紫衣南面再拜稱臣遣子入朝逢堯以使有指擢戶部侍郎坐善太平公主斥朗州司馬終柘州刺史逢堯誣詭當大事敢徼福故卒以附麗廢然唐興奉使者稱逢堯

蕭昕

按唐書本傳昕字中明梁鄱陽王恢七世孫世居河南再中博學宏辭科調壽安尉累遷左補闕哥舒翰爲副元帥拒安祿山辟掌書記翰敗僞道走蜀肅宗立奉詔册見行在歷中書舍人禮部侍郎

代宗狩陝昕由武關從帝擢國子祭酒建請崇太學以樹教本帝寤其言詔羣臣有籍於朝及神策六軍子弟隸業者聽補生員大曆中持節弔回紇回紇恃功廷讓昕曰乃中國亂非我無以平奈何市馬不時歸我直衆失色昕徐曰國家龜定寇難功雖絲毫不遺賞况鄰國乎僕固懷恩我之叛臣爾與連禍又引吐蕃暴我郊甸天舍其衷吐蕃敗北回紇悔懼叩頰乞和非天子卹舊功則隻馬不得出塞下孰爲失信者回紇大慚因厚禮昕遣使者約和轉工部尙書封晉陵侯德宗出奉天昕年八十餘步出城賊求之急獨竄山谷間僅至奉天遷太子少傅爵郡公兼禮部尙書知貢舉久之以太子少師致仕卒年九十二贈揚州大都督諡曰懿昕始薦張鎬來瑱在禮部擢杜黃裳高郢裴垍其後鎬興布衣不數年位將相瑒爲將有威名黃裳等繼輔政並爲名宰云

孔巢父

按唐書本傳巢父字弱翁孔子三十七世孫少力學隱徂來山永王璘稱兵江淮辟署幕府不應鑑蹟民伍璘敗知名廣德中李季卿宣撫江淮薦爲左衛兵曹叅軍三遷庫部員外郎出爲徑原行軍司馬累拜湖南觀察使未行會晉王爲荆襄副元帥署行軍司馬俄而德宗狩奉天行在擢給事中

爲河中陝華招討使累上破賊方略帝嘉納未幾兼御史大夫爲魏博宣慰使巢父辯而才及見田悅與言君臣大義利害順逆開曉其衆是時悅久不臣下皆厭亂雜然喜曰不圖今日還爲王人酒中悅起自陳騎射工曰陛下見用何敵不摧巢父曰若爾不蚤自歸乃一劇賊耳悅曰能爲劇賊豈不能爲功臣乎巢父曰國方多虞待子而息悅謝焉數日田緒殺悅與大將邢曹俊等聽命巢父卽以緒權知軍務紓其難李懷光據河中帝復令巢父宣慰罷其兵以太子太保授之懷光素服待命巢父不止衆忿曰太慰無官矣方宣詔乃諫而合害巢父并殺中人啖守盈初巢父至懷光以其使魏博而田悅死疑其謀出巢父故軍亂不肯救帝聞震悼贈尙書左僕射諡曰忠詔具禮收葬賜其家粟帛存卹之從子戮戮戢

後唐 李巖

按五代史唐臣傳巖幽州人也初名讓坤事劉守光爲刺史後事莊宗爲客省使巖爲人明敏多藝能習騎射頗知書而辯同光三年使於蜀爲王衍陳唐興復功德之盛音辭清亮蜀人聽之皆竦動衍樞密使宋光嗣召巖置酒從容問中國事巖對曰前年天子建大號於鄴宮自鄆趨汴定天下不

旬日而梁之降兵猶三十萬東漸於海西極甘涼北躡幽陵南踰閩嶺四方萬里莫不臣妾而淮南楊氏承累世之彊鳳翔李公恃先朝之舊皆遣子入侍稽首稱藩至於荆湖吳越修貢職效珍奇願自比於列郡者至無虛月天子方懷之以德而震之以威天下之勢不得不一也光嗣曰荆湖吳越非吾所知若鳳翔則蜀之姻親也其人反覆其可信乎又聞契丹日益彊盛大國其可無慮乎嚴曰契丹之彊孰與僞梁光嗣曰比梁差劣爾嚴曰唐滅梁如拉朽况其不及乎唐兵布天下發一鎮之衆可以滅遼使無類然而不在九州之內自前古王者皆存而不論蓋不欲窮兵黷武也蜀人聞嚴應對愈益奇之是時蜀之君臣皆庸暗而恃險自安窮極奢僭嚴自蜀還具言可取之狀初莊宗遣嚴以名馬入蜀市珍奇以充後宮而蜀法嚴禁以奇貨出劍門其非奇物而出者名曰入草物由是嚴無所得而還惟得金二百兩地衣毛布之類莊宗聞之大怒曰物歸中國謂之入草王衍其能免爲入草人乎於是決議伐蜀冬魏王繼岌西伐以嚴爲三川招討使與康延孝以兵五千先行所過州縣皆迎降延孝至漢州王衍告曰得李嚴來卽降衆皆以伐蜀之謀自嚴始而衍怨嚴深不宜往嚴聞之喜卽馳騎入益州衍見嚴以妻母爲託卽日以蜀降嚴還明宗以爲泗州防禦使客省使如

故後孟知祥偏疆於蜀安重誨稍裁抑之思有以制知祥者嚴求爲西川兵馬督監將行其母曰汝前敢破蜀之謀今行其以死報蜀人矣嚴不聽初嚴與知祥同事莊宗時知祥爲中門使嚴嘗有過莊宗怒甚命斬之知祥戒行刑者少緩入白莊宗曰嚴小過不宜以喜怒殺人恐失士大夫心莊宗怒稍解命知祥監管嚴二十而釋之知祥雖與嚴有舊恩而惡其來蜀人聞嚴來亦皆惡之嚴至知祥置酒從容問嚴曰朝廷以公來邪嚴曰君命也知祥發怒曰天下藩鎮皆無監軍安得爾獨來此此乃孺子熒惑朝廷爾卽擒斬之明宗不能詰也知祥由此遂反

遼 耶律虎古

按遼史本傳虎古字海鄰六院夷離董覲烈之孫少穎悟重然諾保寧初補御瑋郎君十年使宋還以宋取河東之意聞於上燕王韓匡嗣曰何以知之虎古曰諸僭號之國宋皆併收惟河東未下今宋講武習戰意必在漢匡嗣力沮乃止明年宋果伐漢帝以虎古能料事器之乃曰吾與匡嗣慮不及此授涿州刺史統和初皇太后稱制召赴京師與韓德讓以事相忤德讓怒取護衛所執戎仗擊其腦卒子磨魯古

蕭和尚

按遼史本傳和尚字洪寧國舅大父房之後忠直多志略開泰初補玉盞郎君尋爲內史太醫等局都林牙使宋賀正將宴典儀者告班節度使下和尚曰班次如此是不以大國之使相禮且以錦服爲貺如待蕃部若果如是吾不預宴宋臣不能對易以紫服位視執政使禮始定入年秋爲唐古部節度使卒弟特末

牛溫舒

按遼史本傳溫舒范陽人剛正尙節義有遠器咸雍中擢進士第滯小官大安初累遷戶部使轉給事中知三司使事國民兼足上以爲能加戶部侍郎改三司使壽隆中拜叅知政事兼同知樞密院事攝中京留守部民詣闕請真拜從之召爲三司使乾統初復叅知政事知南院樞密使事五年夏爲宋所攻來請和解溫舒與蕭得里底使宋方大燕優人爲道士裝索土泥藥爐優曰土少不能和溫舒遽起以手藉土懷之宋主問其故溫舒對曰臣奉天子威命來和若不從則當卷土收去宋人大驚遂許夏和還加中書令卒

宋 畢仲衍

按宋史畢士安傳士安曾孫仲衍字夷仲以蔭爲陽翟主簿舉進士中第調沈丘令歐陽修呂公著薦之入司農爲主簿升丞吳充引爲中書檢正奉使契丹宴射連破的衆驚異之且偉其姿容密使人取其衣爲度製服以賜時預其元會盡能記其朝儀節奏圖書歸獻後錢勰出使契丹主猶問畢少卿何官今安在王珪與充不相能以仲衍爲充所用數求罪過欲傷之卒無可乘但留滯不遷經四年乃以祕閣校理同知太常禮院爲官制局檢討官制文字千萬計區別分類損益刪補皆曲盡其當凡從中問其事必須仲衍然後報他人不知也撰中書備對三十卷士大夫家爭傳其書高麗使入貢詔館之上元夕與使者宴東闕下作詩誦聖德神宗次韻賜焉當時以爲寵官制行帝自擢起居郎王珪留除命謂爲太峻爭於前帝連稱曰是當得爾未幾暴得疾一夕卒年四十三帝遣中使唁其家賻錢五十萬

高遵裕

按宋史本傳遵裕字公綽忠武軍節度使瓊之孫也以父任累遷供備庫副使鎮戎軍駐泊都監夏